

# In amal hual Pablo in lanahuatini quijcuiluilic Filemón

---

## Quipialtía Filemón

<sup>1</sup>Nehual Pablo niunca latzacuali calijtic, nejtzacuaje nican pampa nictequipanuilía Cristo Jesús. Huan tocní Timoteo timitzijcuiluilijtcate in amal, lasojli Filemón, tehual hual titequipanúa ca tehuanten. <sup>2</sup>Noje in amal antimitzjicuiluilijtcate amhuanten in laneltocanijmes hual anmonechicúa pa mochan, lasojli Filemón. Huan noje antimitzjicuiluilijtcate tocní sihual Apia huan tocní Arquivo, yihual quinami iguache in Tata jan quinami tehuanten. <sup>3</sup>Ma Dios toTajtzin huan in Tata Jesucristo anmitzpiacan ca in cuali hual san yehuanten quipialo pa tehuanten. Huan ma anmitzpiacan ca inminmosehuilisi pa anmoyolo.

## Pablo quijtúa quinami lalasojla huan laneltoca Filemón

<sup>4</sup>Nicsehuía noDios mojmosta quiman yes nimitzjnamiquía pa mochi tonalijmes quiman niclajlanía Dios. <sup>5</sup>Unca pampa nechlamachilito quinami amo timocahua pa ticlasojlas in Tata Jesús huan quinami ticlalía molaneltocalisi ca yihual. Noje nechlamachilito quinami tiquinlasojla yehuanten hual Dios quinlajtultic pa yesi iyaxca. <sup>6</sup>Nictemachía Dios pa yihual mitzhueliltis pa tictemus

quinami tiquinlamachiltis oc sequin quinami ticneltoca Jesucristo, pa yoje yehuanten noje quinequisi quineltocasi. Yoje ajsisi quimatisi len quinequi quijtúa mochi innojen cuajcuali hual ticpialo pampa tehuanten timochihuaje ilacames Cristo. <sup>7</sup>Niunca ca niman m'ac paquilisi huan nimomaca chicahualisi pampa nicmati quinami tilalasojla, Nito, pampa tehual niman miac tiquinmaca chicahualisi pan inminyolo yehuanten hual Dios quinlajtultic pa yesi ilacames.

## Pablo quitemachía Filemón se lachihualisi cuali

<sup>8</sup>Yoje, mas que nicpía nolahueliltisli pampa nehual niunca ilanahuatini Cristo huan pampa inon huil nicana eslito pa nimitzilis len monequi pa ticchías, ma yojque, amo nicchías inon. <sup>9-10</sup>San nimitzljalanía pa tijchihuilis inon pampa timolasojlalo. Nehual niPablo niabuelito hual axan noje niunca latzacuali pin calijtic pampa nicneltoca Cristo Jesús, n'ía nimitzyantía ca in lasojlalisli pa tijchihuilis in lachihualisi cuali pa in Onésimo. Yihual unca quinami noxolol. Unca quinami lacatic ca nehual nican pin calijtic capa niunca latzacuali, pampa quineltocac ilajtol Dios hual niclamachiltic. Huan yojque yihual lacatic ca Dios.

<sup>11</sup> Pa yina, amo mijchihuiclic lapalehuilicli. Ma yoje, axcan mijchihuiclí lapalehuilicli tehual huan jan yojque nejchihuiclí lapalehuilicli nehual noje. <sup>12</sup> Axcan yihual nictilanía ca tehual oc sejpa, quema, yihual, hual niclasojla niman míac. <sup>13</sup> Huan nehual nicnectataya pa mojmosta huil nicpiasquiaya nican ca nehual. Yojque yihual nechtequipanuicli pa in tonalijmes quiman nimoitas latzacuali calijtic nican, pampa niclamachiltía ilajtol Dios. Niquijtuc sinda nechtequipanuicliaya, cuaquín cataya quinami tehual tichtequipanuicliaya. <sup>14</sup> Ma yoje, amo nicnequiaya nicchía nindeno sinda ayamo nicmatiaya da tehual tichmacahuiclisquiaya pa nicpiasquiaya yihual nican ca nehual. Yojque amo tijchihuicliaya nehual in lachihualicli cuali pampa ticpiaya pa tijchihuiclisquiaya. Yesquiaya pampa ticnequiaya tijchihuicli. <sup>15</sup> Inon nimitzilía pampa cuajnesi cataya pampa inon yihual yec lahuicali pa camo cayasquiaya pa mochan se nadita. Niquijtúa, amo ticpiaya pa se nadita pa yojque ticpiasquiaya oc sejpa. Huan quiman cayasquiaya ca tehual oc sejpa, cuaquín amo quiman tilamisquiaya ticpía. <sup>16</sup> Niquijtúa, yajmo ticpías quinami tequipanujquil pampa yihual axcan unca len niman cuali pa tehual. Amo yesquiaya yoje cuali pa tehual sinda jan mocahuaya se tequipanujquil san. Axcan ticpías Onésimo quinami mocni hual ticlasojla, quinami nehual axcan nicpía quinami nolasojli nocni. Unca pampa yihual nicnextilic iojli Cristo. Ma yoje, yihual Onésimo axan unca niman míac molasojli, pampa amo jan unca lacal san pa tehual. Noje yihual mocni pampa yoje quichíac in Tata. <sup>17</sup> Pampín, sinda tichita nehual quinami mocni tequipanujquil pa

in itequipanulicli in Tata, cuaquín xicnamiqui Onésimo ca lanequilicli quiman ajsis pa mochan, jan quinami tichnamiquisquiaya nehual. <sup>18</sup> Huan sinda yihual mitzcajcayahuac o sinda yihual mitzhuiquilía len, xichcahuicli pa niclaxlahuis. <sup>19</sup> Nehual Pablo niquijcuilujtica inon ca nehual nomajma, nimitzlahuis. Inon nimitzilía san pa camo nimitzijnamiquiltis pampa tehual tichuiquilía nehual moyulicli. Cataya pan nopampa nehual ticanac iojli Cristo. <sup>20</sup> Quema, Nito, ma nicpía se lachihualicli cuali pan mopampa tehual. Inon nicpías quiman niquitas quinami ticneltocas toTata, niquijtúa, quiman ticnamiquía Onésimo quinami mocni. Yojque tichmacas paquilicli pa noyolo pampa yoje ticneltoca Cristo.

<sup>21</sup> Nicmati pa noyolo pampa tehual tía ticneltoca in Tata. Yojque, nimitzijcuilicli pampa nicmati tehual tijchihuicli niman míac, huan amo san inon hual nimitzilic pa ticchías. <sup>22</sup> Noje nimitzilía pa ticchijchías se calijtic pa nehual, pampa nicchixtica da yalo nechmacahualo. Quema, niquisas nican pampa amhuanten anquilajlantica Dios pa nejchihuicli in cuali hual san yihual huil tejchihuicli. Yojque huil annimitzpxalulicli.

### **Quinchicahua huan quinmaca latuchihualicli**

<sup>23</sup> Mijchicahua Epafras, yihual huan nehual ticate latzacuali pin calijtic pampa yihual noje quilamachiltiaya ilajtol Cristo Jesús. <sup>24</sup> Mijchicahualo Marcos huan Aristarco huan Demas huan Lucas, ca nehual tequipanulo yehuanten.

<sup>25</sup> Ma caya ca amhuanten anmoyolo in cuali hual san Jesucristo huil tejchihuicli.